

■ COLUMNA

Encunter il «puccau mellen»

DA BERNARD CATHOMAS

Gion vegn en la regenza, Tina ha success professional, Madlaina fa ina buna partida, Peder fa raps. E blers che vesan quai èn scuidus. La scuidanza saja la pli veglia sur-silvana, l'invilgia la pli preschenta engiadinaisa. Bun per il Grischun, pretend jau.

La scuidanza, l'invilgia s'auda tar ina societad che ha success e fa progress. Per svegliar tals sentiments dovri insatgi che cuntanscha dapli ch'ils auters. Tgi che tema la scuidanza, snega da crescer e sa sviluppar. Sentiments da scuidanza mussan, tge ch'ins vuless cuntanscher. La scuidanza sveglia l'energia da realisar sez quai ch'auters han realisà. Bun pia, sche giuvens artists ed interprendiders, perscrutadras, secretaris u scolastas èn scuidusas sin quellas che han success. Quai anime-scha da dar tut per arrivar a la medema finamira. Da far ch'auters èn scuidus e s'engaschan per avair success.



Neid muss erarbeitet werden». Fin ch'insatgi vegn scuidus sin tai stosti prestar e vegnir tar insatge. Igl è da l'autra vart er nagina zanur dad esser scuidus. Ins mussa uschia, tge che quinta er per ins e tge ch'ins vuless er sez avair. En quest senn ha la scuidanza ina forza constructiva. Ella gida ad enconuscher sasez.

Etuttina èsi penibel da conceder ch'ins è scuidus. Sentiments da scuidanza valan sco vargugnus. Scuidus èn ils auters, pretend ins.

Zuppentar la scuidanza po esser fatal. Ella sa

fugar e manar ad odi ed agressiuns. Ella sa daventar destructiva. Quai vegn ad esser il motiv che las grondas religiuns mundialas emprovan da supprimer ed extirpar ella. En ducrina avain nus emprendì che la scuidanza s'auda tar ils vizis. Esser scuidus valeva sco putgà. «Il puccau mellen», sco ins scheva en Surselva. Nagin dubi che blers avessan blier da confessar sut quest titel.

Sche nus vesessan la scuidanza dentant mo sco malfatg, manchentas-nus insatge impurant. Sco blier auter ha ella aspects positivs e negativs da pasar in cunter l'auter.

Pli gugent ina societad che ha motiv dad esser scuidusa sin quels che han success – ch'ina societad, nua che nagut sa mova per tema ch'insatgi savess cuntanscher insatge dapli ch'ils auters. Il meglier: sche adina auters èn scuidus e retschaivan impuls da realisar projects da success che fan ch'adina auters vegnan scuidus.